



partii naleraq

Nuuk 4. oktober 2018
Pele Broberg Partii Naleraq

Aningaasanut inatsisissatut siunnersuut

(Aningaasaqarnermut Naalakkersuisoq)

Siullermeernera

Naliginnaasuvoq ukiami katerisimaarnerni Ukiup tulliuuttup nunatta aningaasalersornissaa oqaluuserissallugu.

Taamaattoq arlallit pissagassutigisimavaat Partii Naleqqamit qanoq oqariartuuteqarumaarnersugut. Tassami uanga Aningaasaqarnermut Naalakkersuisuusimasutut, Naalakkersuisut sinnerlugit suliarinikuugakku.

Oqaatsit kusanartut

Timitalerneqarnej ajortut...

Oqaatsit taakku qasseriartuta tusareerpavut, kisiannili aamma ukioq manna tusarneaqqissapput.

Tassami naalakkersuinermit isumaqatigiissut maajimi atsiugaq malillugu imaqarsimagaluarpoq. Taakkunani imm.152, imm.154, imm.155 minnerunngitsumillu imm.156 iliuuseqarfiginiarlugit naalakkersuisoqarfiit akornanni tusarniaassutigineqarsimalluni. Allaqqaneri eqqaamaneqanngippata pingaarnertut imm.156 taassavara:

” Suliffeqarfinnut namminersortunut akileraarut appartinneqassaaq nunatsinni suliffinnik pilersitsinissap orniginartuunissaa eqqarsaatigalugu, nunattalu nunanut sanilerisatsinnut suleqatigisatsinnullu unammillersinnaassuseqartuarnissaa anguniarlugu. ”

Ajoraluartumik atorfilittat akornanni tusarniaanitsinni politikki ersarissaq, tassa ingerlatsiviit isertitaminnit akileraarutaat 15%-imut appartinnissaa iluarineqarsimangilaq, tunuartinneqartariaqarlunilu siunnersuut.

Qaammatit ikitsuinnaat ingerlaneranni angusat annertusimasinnaaqisut suliarisimavakka, oqaatsilli kusanartut timitalerneqarsimangillat.

Maanna Naalakkersuisut tapertaasalu suleqatigiinnissamut oqaatsit kusanartut atoqqippaat, maannali naalakkersuisooqatigisimasavut timitaliiumasimangereerpata qanoq uppernartigiva?

Naleqqukkunnaarpoq

Taavami soq inatsisissamut siunnersuuteqarsimavunga, maannalu isornartorsiulerlugi?

Tunngaviusumik akissutaa naatsunnguvoq. Naleqqukkunnaarpoq.

Pissutsit allanngormata Naalakkersuisup Siulittaasua aamma Statsministeri Lars Løkke Rasmussen atsioqatigiimmata, kingornalu ikinnerussuteqarlutik Naalakkersuisut isumaqatigiissusiorneranni.

Aningaasanut Inatsisissamik Siunnersuut 2019 taakkartorpa Kalaallit Airports A/S 2.100 million koruuninik aningaasalersugassaasut, taakkulu kisitsisit maanna qaffapput. Aali sulii Inatsisartut mittarfinnut inatsisissamat siunnersuut sulii isummerfiginngikkaat.

Maanna Air Greenland A/S pisiarinissaanut aningaasaliinissaq ilaasariaqarpoq, taakkulu naatsorsuutigineqarsinnaapput aningaasarpaaluussasut. Danskit mittarfinnut ilaaniarlutik neqeroorutaat erniakikkaluit, aningaasanik attartuisariaqarnerup kinguneranik aningaasanik sipaarfiunani landskarsimut aningaasartuutaasussaagamik. Aningaasaqarnermut Naalakkersuisuusimavunga, suliarisimasaralu maanna naleqqukkunnaarpoq.

Akissaqartitavut

Qularnanngilaq Naalakkersuisut nutaat tapertaasalu Aningaasanut inatsisissamat siunnersuut 2019-moortoq naqqiuteqarfigiumaaraat imaluunniit ilalerumaaraat. Tassami maanna aamma Kangerlussuup Sisimiullu akornani aqquserniornissaq aningaasalersugassaassaaq, tamannalu Partii Naleqqamit taperserparput.

Kisianni sumiinngaanniit aningaasat nassaarineqassappat?

Ullumikkulluunniit Kalaallit Airports A/S-imut akilersugassaannngitsut erniaaqannngitsut akiliutissat landskarsimiinngillat.

Namminersortut suliffeqarfiutaasa karsii aallerfigisariaqarparvut.

Immaqami oqaaseq allaqqasoq: "*siunnerfigaat*" paasineqaannarsinnaavoq oqaasiusoq kusanartoq timitalertariaqannngitsaq.

Mittarfissuarnut Inatsisissaq Inatsisartuni suliaanera ataqqineqarsimavoq, taakkulu kisiisa akissaqartillugit.

Ilinniartitaaneq

Uteqattaarneqarpoq mittarfissuit sananeqannngippata nunarput ineriartorsinnaannngitsaq, nunanit allanit qimataassalluta unammilleqatigiinnikkut.

Taannali mittarfissuarnit tunngaveqannngilaq. Sinaakkutit tulluutinngitsut, soorlu ingerlatsiviit isertitaminnit akileraarutaat nunanit unammillertitsinniit marloriaataasoq, tunngaviuneruvoq.

Mittarfissuarnullu aningaasat atugassaraluit qanorli ilinniartitaanermut ukiuni tulluuttuni qulini atornerqaraluarpata? Tassa siunissamat ineriartortitsinissamat aningaasaliineq!

Aningaasanut inatsisissamat siunnersuut 2019-moortoq suliaavoq allaffissornikkut sipaarniutit annikitsuararsuit ilinniartitaanermi sipaarniutigalugit, aali 2.100 million koruunit mittarfissuarnut nassaarisussaallugit.

Ulluinnarsiutit

Mittarfilerngoqqusaannerup ataani puigorneqarsimasut tassaapput ulluinnarsiutaanerusut, kisiannili inuiaqatigiit amerlanerit atugassarititaat.

Ilulissani mittarfissuartaarpat Upernavimmi ulluinnarni malugigaarnaviannngilaat, attaveqarnermi nunatta sinnerani allannguuteqassannngimmat. Qeqqata kommunia eqqaassannngikkaanni.

Immaqaa uffa inuit ulluinnarni atugassarititaat, soorlu sanaartornermi aningaasalerneqartartut, meeqqeriviit, napparsimaveqarfiit minnerunngitsumillu Angallannermut Kiffartuussinermut

Isumaqatigiissutit siulliukkaanni. Taava nunatta orniginassusaa aammalu najugaqarfigiuminartera iluaquserneqassagalarpoq.

Inuusuttut, ilinniarluarsimasut aammalu utoqqaat nunanut allanut nuuttarunnaarlutik maani inuuneq akissaqartilerlugu.

Suleqatigiinneq

Aningaasanut inatsisissamut siunnersuut 2019-moortoq torersumik ingerlanneqarsinnaanera qularnarsereerpoq, Naalackersuinnermut isumaqatigiissut alarallarlugu mittarfissuarnut inatsisissamut siunnersuut qiviaannaraanni.

Isertuussilluni sulineq qulaaniillu aqutsineq qimallugu, imminut sullinneq alarlugu suleqatigiinneq periarfissaavoq piumagaanni.

Partii Naleraq piareersimavoq Aningaasaqarnermut Inatsisissamut Siunnersuut 2019-imut naleqqussaaqataassalluni. Periarfissat ilagivaat Mittarfissuarnut Inatsisissatut Siunnersuutip Upernaamut Katerisimaarnissamut oqallisissatut kinguartinnera.

Islandimi timmisartortitseqatigiiffik ataaseq akiliisinnajunnarluni uneqqammivoq, aammalu Icelandair ajornartorsiungaaqalutik. Tassa aamma siunissaq taamaattoq tuavisaaqaluta ornitarput? Ullumikkut nunatta aningaasaqarnera ingerlalluartutut taaneqaqattaarpoq, sooq taava torinngitsumik tuavisaarluta Aningaasanut inatsisissamut siunnersuut 2019-moortoq suliarissavarput?